

Convenio de colaboración entre a Consellería de Educación, Universidade e Formación Profesional e o Concello de Cangas para o desenvolvemento de ensinanzas de formación profesional da familia profesional Actividades Físicas e Deportivas

Santiago de Compostela, 13 NOV. 2019

REUNIDOS

Dunha parte, _____, na súa condición de conselleira de Educación, Universidade e Formación Profesional, en virtude do seu nomeamento mediante o Decreto 96/2018, do 26 de setembro, no exercicio das atribucións que lle confire o artigo 34 da Lei 1/1983, do 22 de febreiro, reguladora da Xunta e a súa Presidencia, e o artigo 3 do Decreto 138/2018, do 8 de novembro, polo que se establece a estrutura orgánica da Consellería de Educación, Universidade e Formación Profesional.

E doutra, _____, na súa condición de alcalde-presidente do Concello de Cangas, no exercicio das competencias que lle atribúe o artigo 21.1.b) da Lei 7/1985, de 2 de abril, reguladora das bases de réxime local.

Ambas as partes recoñécense a capacidade legal necesaria para formalizar este convenio de colaboración, consonte os principios de colaboración, cooperación, coordinación e eficacia que deben presidir as actuacións das administracións públicas, e

EXPOÑEN

1.- Que a formación é un instrumento necesario para o desenvolvemento integral das persoas e, especialmente, da xuventude galega, polo que se fai necesario o aproveitamento óptimo dos

recursos dispoñibles, a coordinación e a integración de esforzos e a mutua colaboración entre a Administración Local e a Educativa.

2.- Que a Consellería de Educación, Universidade e Formación Profesional, na oferta educativa do Instituto de Ensinanza Secundaria María Soliño de Cangas, inclúe ensinanzas de formación da familia profesional Actividades Físicas e Deportivas. Para a impartición destas ensinanzas necesítanse instalacións deportivas que o nomeado centro non posúe.

3.- Que o Concello de Cangas comparte os mesmos desexos antes expostos, e por esta razón, está disposto a colaborar e a prestar as axudas necesarias para un funcionamento eficaz das referidas ensinanzas no Concello.

4.- Que ambas as institucións desexan seguir as recomendacións do artigo 25 da Lei 7/1085 de 2 de abril, reguladora das Bases do Réxime Local, sobre a promoción do deporte e instalacións deportivas.

En consecuencia, estas administracións acordan subscribir o presente convenio, con base nas seguintes

CLÁUSULAS

Primeira. O obxecto do presente convenio é establecer a colaboración no eido da formación profesional regrada entre o Concello de Cangas e a Consellería de Educación, Universidade e Formación Profesional; especialmente no desenvolvemento de ensinanzas de formación profesional da familia profesional Actividades Físicas e Deportivas.

Segunda. A Consellería de Educación, Universidade e Formación Profesional asume o funcionamento e organización das ensinanzas de formación profesional da familia profesional Actividades Físicas e Deportivas que se imparten no Instituto de Ensinanza Secundaria María Soliño de Cangas

Terceira. O Concello de Cangas – Concellaría de Ensino e Deporte – facilitará o uso de instalacións deportivas (pistas de atletismo, pavillóns deportivos, pistas polideportivas ao aire libre,...), así como outros espazos urbanos dependentes do Concello, para a impartición dos módulos correspondentes ás ensinanzas técnico-deportivas de grao superior que os precisen.

Cuarta. O Concello de Cangas – Concellaría de Ensino e Deporte – facilitará o uso da Piscina Municipal “A Balea”, dependente do Concello, para a impartición dos módulos correspondentes ás ensinanzas de formación profesional da familia profesional Actividades Físicas e Deportivas.

Quinta. O acceso a estas instalacións deportivas por parte do alumnado das ensinanzas referidas anteriormente realizarase de acordo cun horario que determine a Concellaría de Ensino e Deporte do Concello de Cangas, conforme ao marco horario xeral das propias instalacións, do centro docente e ao calendario escolar do curso e ás normas establecidas do uso das instalacións.

Sexta. O Concello de Cangas - Concellaría de Ensino e Deporte - Cangas atenderá os gastos xerais das instalacións deportivas así como tamén os derivados da conservación, reparación e mantemento das referidas instalacións, como titular delas.

Sétima. O IES María Soliño de Cangas, a través do Departamento de Educación Física, facilitará a colaboración coa Concellaría de Ensino e Deporte na organización e promoción de actividades e xornadas vinculadas á animación físico-deportiva-saudable, dirixidas a todas as idades (visibilización de Deporte na rúa, Semana do deporte,...)

Oitava. A aplicación do presente convenio non implica ningún tipo de gasto para a Consellería de Educación, Universidade e Formación Profesional.

Novena. Establécese unha comisión de seguimento, control e supervisión que se reunirá como mínimo unha vez ao ano co obxecto de facer un balance das accións desenvolvidas e planificar as actividades futuras.

Esta Comisión estará constituída por:

- a.- Unha persoa representante da administración educativa, designada pola Xefatura Territorial da Consellaría de Educación, Universidade e Formación Profesional de Pontevedra, que presidirá a comisión.
- b.- O/a director/a do Instituto de Ensinanza Secundaria “María Soliño” de Cangas ou persoa en quen delegue.
- c.- A persoa titular da Concellaría de Deporte do Concello de Cangas, ou persoa en quen delegue.
- d.- Unha persoa designada polo Concello entre o seu Persoal Técnico.

Décima. O presente convenio terá unha vixencia de dous anos, dende a data da súa sinatura, e prorrogarase tacitamente por períodos anuais mentres non exista denuncia por algunha das partes. A dita denuncia deberá realizarse por escrito e cunha antelación dun mes á data de finalización.

Décimo primeira. Este Convenio terá carácter administrativo e os seus efectos rexeranse polo establecido nas súas cláusulas.

No non previsto, aplicaráselle os principios recollidos na Lei 9/2017, do 8 de novembro, de Contratos do sector público, co fin de resolver as dúbidas e lagoas que puidesen presentarse.

A xurisdición contencioso-administrativa será a competente para dirimir as cuestións litixiosas que puidesen xurdir da aplicación deste convenio.

E para que así conste, asínase este convenio por triplicado exemplar no lugar e data indicados.

A CONSELLEIRA DE
EDUCACIÓN, UNIVERSIDADE
E FORMACIÓN PROFESIONAL

O ALCALDE-PRESIDENTE DO
CONCELLO DE CANGAS
